



UNIVERSITÄTS-
BIBLIOTHEK
PADERBORN

Universitätsbibliothek Paderborn

**R. P. Sebastiani Henrici Penzingeri, Consistorialis
Passaviensis, Decani, & Parochi in Trauttmanstorff ad
Laitam Bonus Ordo Triplicis Formatae Concionis Moralis In
Omnia Festa Sanctorum In Amplissima ...**

Penzinger, Sebastian Heinrich

Solisbaci, 1698

Concio Prima. Textus Evang. Discipulus ille non moritur. Joannis cap.21.
Thema: Virginitas, ac castitas, facit immortales.

[urn:nbn:de:hbz:466:1-51763](https://nbn-resolving.org/urn:nbn:de:hbz:466:1-51763)

PRO FESTO S. JOANNIS
EVANGELISTÆ.

CONCIO PRIMA.

Exiit sermo iste inter fratres, quod discipulus ille non moritur. Joan. cap. 21. Textus.

Virginitas, & Castitas, est immortalis. Virgines non moriuntur. Thema.

Novam vitæ genesim puritas efformat, & infœcunda ad prolem castitas, ad vitam generandam fecundissima est. Exordium.
Supra mortem se erigit pudicitia, & immortalis à funere evadit: perorat de Padilla Annot. 11. in Habacuc cap. 3. v. 15. disc. 6. Virgo Joannes Evangelista fuit; teste S. Thoma, qui in cap. 13. Joannis scribit: *Mundiciam à puero habuit; & Ecclesia subnectit: Virgo est electus à Deo; & Virginem Virgo commendavit.* Audiamus de Virginitate S. Joannis Evangelistæ disserentem S. Damascenum serm. 1. de S. Joanne: *Beatus Joannes tantò reliquas Virgines superat, quantò Virginitati beata Maria per sedulitatis, ac perpetuæ custodiæ meritum appropinquet, à qua sola videlicet præceditur; ita ut sicut veneranda Matris Domini Virginitas, beati Joannis Virginitatem excedit; sic ipse pro glorioso ejus contubernio cæteras à mundi primordio Virgines antecellit.* Nolentes ergo cæteri Apostoli Joannem castissimam esse virginem, inferunt: *Discipulus ille non moritur: immortalis enim est Virginitas; Audiamus desuper DEI Verbum: Felix est Sterilis, & incoïnquinata, &c. habebit fructum in respectione animarum.* Scriptura.

- marum sanctarum. Ita Salomon Sapientiæ cap. 3. & cap. 4. O quam pulchra est casta generatio, &c. immortalis est enim memoria illius. Angelus Joanni profitetur: Apocalyp. cap. 14. Hi sunt, qui cum mulieribus non sunt coinquinati, Virgines enim sunt, hi sequuntur Agnum quocumque ierit. Qui seminant in spiritu, de spiritu & merent vitam internam, ad Galatas cap. 6. Audiantur & Patres:
- Virginitas corona est, que nunquam marcescit, mortem destruens, possidens verò immortalitatem,* S. Achanasius lib. de Virg. Vivendi sibi usum quasivit è cælo, que Sponsum sibi in cælo invenit. Hæc nubes, aëra, Angelos, sideraque transgrediens, Verbum Dei in ipso sinu Patris invenit, & toto haustit pectore, ita eleganter de
- Virginitatis laurea perorat* S. Ambrosius: lib. I. de Virg. *Sola est castitas, qua in hoc mortalitatis loco, & tempore, statum quendam immortalis gloriæ representat. Sola inter nuptiarum solemniam beatæ illius vendicat regionis, in qua nec nubent, neque nubentur, præbens quodammodo in teris, cælestis illius conversationis experientiam,* ita mellissuè S. Bernardus epist. 42. *Nulla virtuti tam propriè carnales homines Spiritualibus Angelis imitatione conversationis æquantur, quàm merito, & gratiâ castitatis; per quam adhuc in terra degentes habent, secundum Apostolum, municipium in cælis, quod deposita corruptelâ carnali habituros Sanctos promittitur in futurum, hinc jam in carne fragili possidentes.* scribit S. Cassianus lib. 6. cap. 6. *Quod futuri sumus, vos jam esse captis, vos resurrectionis gloriâ in hoc sæculo jam tenetis, per seculum sine seculi cogitatione transitis, cum castæ perseveratis, ac Virgines, Angelis Dei estis æquales.* ita S. Cyprianus de habitu Virg. lib. I. *Nonne tres Pueri Virginitatem colentes igne periores evaserunt, per Virginitatem corporibus ab igne inexpugnabilibus factis? Nonne Danielis corpori Virginitate solidato, ferarum dentes insigi non potuerunt? Ornate perorat* S. Damascenus lib. 4. Orth. fid. cap. 25. *Concludo: Ergo Virginitas immortalis: uti invocata Dei gratia, Conceptibus deducam.*

CONCEPTUS I.

Ad cruentum factum rabidi Cain, inflictam inquam cædem, & mortem Abelis, adest præ foribus justus Deus, iniquo Cain delictum exprobrat, indicando: *Vox sanguinis fratris tui clamat ad me de terra*, Genes. 4. Notare libeat verbum: *Clamat*: Ponamus nunc casum: Fatali quis vulnere cruentatus cadit, quamdiu, licet pallentibus labiis, adhuc loquitur, mortuus non censetur, sed vivus, & superstes est; Nunc ad factum: Abel quidem prostratus jacet; sed, teste DEO, clamat, loquitur: *Vox sanguinis, &c.* Ergo Abel mortuus non est, clamat sanguis, ergo post tot mille sæcula huc usque vivit, superstes est; Quid Abel immortalem fecit? Quid Abeli tribuit vitam sine fine duraturam? Tribuit hanc Virginitas, castitas: Abel castus, impollutus, Virgo est; *Virginitas, & intermerata Castitas, mortis imperium ignorant, Castitas Privilegio gaudet, ut nesciat interitum, ignoret occisionem; immunis à morte, adhuc post mortem perhibetur, & virtutis functiones neque ipsa mors finit, quia Virginum prerogativa est, mortis Dominio non subijci.* Ita perorat doctissimus de Padilla Annot. 11, in Habacue cap. 3. v. 15, discursu 6.

CONCEPTUS II.

Herodes audiens mirabilia opera Christi, inquit: *Joannes Baptistæ resurrexit à mortuis, & propterea virtutes operantur in illo.* Marci cap. 6. Quid loqueris Herodes? utique in disco Joannis caput, cadaver exanime, prostratum super pavementum conspexisti? Unde ergo Joannem Baptistam vivere, asserere, & concludere potes? *Virtutes operantur in illo*: Joannem Baptistam Virginitatem, & Castitatis propugnatorem noverat Herodes, adhuc tinnunt Regi aures, super Virginis imperterritæ voces: *Non licet tibi habere uxorem fratris tui.* Prudenter ergo infert Rex: Joannes Baptistæ non est mortuus, sed adhuc vivit, *virtutes operantur in illo*; Virginitas immunis à morte adhuc post mortem perhibetur, & virtutis functiones, neque ipsa mors finit.

M

CON-

CONCEPTUS III.

Josue magni Ducis populi Judaici nullus factus est funeris apparatus, nullus luctus, nullus planctus, cum tamen Jacob fetu 70. Aaron, & Moyfes 30. dierum, Samuel quoque planctu magno sepultus sit; cur similis luctus, planctus, in funere Josue non est institutus, & celebratus? annon ultimum funeris honorem, & communem planctum JOSUE meritus est, qui tot cruentis proeliis, pro incremento populi Israelitici, vitam generosè prostituit, gloriosè hostes prostravit, Reges & Imperia, Dominio, & Imperio Judæorum subjecit? cur ergo ultimum funeris honorem, luctum, & planctum non exhibent? num fors mortuum non existimant? hinc funebri apparatu, ac luctu non indigeat, qui adhuc vivit & perennat? Ita subscribit S. Hieronymus lib. I. adversus Jovianum: *Moyfes moriens plangitur à populo Israël: Josue autem quasi victurus non plangitur; nuptia enim finiuntur in morte, Virginitas post mortem incipit coronari, immortalis est enim memoria illius.* Ex his Verbis Sancti Hieronymi eruitur, Josue vixisse castum, vixisse Virginem; castam Virginem non plangunt mortuam Judæi, cum hæc post funera vivat: Augusta immortalitatis corona redimitæ Virgines perhibentur, injurias mortis non sentiunt.

CONCEPTUS IV.

Intellecta morte Lazari fratris Marthæ & Magdalenæ, dicit suavissimus Dominus ad discipulos suos: *Lazarus amicus noster dormit.* Joann. 11. Idem dicit Salvator noster de Filia Principis, Matth. 9. *Non est mortua puella, sed dormit.* Dormire actus viventis est, ac in vita existentis, ex mente Theophylacti loquor: *Vide, quomodo Dominus quamvis mortuo Lazaro dixerit quasi ad viventem.* Revera, Lazarus, & Filia Principis occubuerunt, exspirarunt, mortui sunt; si revera mortui, quomodo salvatur Verbum Christi, qui & Lazarum & Puellam dormire dicit, dormire inquam, quod est vivere? Respondet de Lazaro Theophylactus: *Etiam vivebat Christo:* de Filia Principis scribit Josephus Mansi, in *Ærario Evangelico,*
Domi-

Dominica 23. post Pentecost. cap. 9. Matth. v. 24. Num. 12. *Filia hæc, etiamnum ætatem agebat innocentem*: Duo hæc Doctorem assumo asserta: Lazarus vivebat Christo: Filia Principis innocentem agebat ætatem, ergo ambo casti, ambo Virgines, Virgines, castos, dormire dicit Christus, dormire, id est: Vivere, *immortalis est enim corona illius.*

CONCEPTUS V.

De Matribus innocentium Pusionum ab Herode crudeli ferro interemptorum scribit S. Matt. cap. 2. *Noluit consolari, eò quod non sint*: Interrogo ego, quid non sunt? an non occisi & interempti Filii? an non sunt mortui chari Pusiones? non sunt mortui; vivunt & cursitant lætabundi cum Duce Jesulo in cœli atrio gratiosi parvuli: ita subscribente S. Chrysostomo hom. 3. *Noluit consolari, quia non erant mortui, qui mortui reputabantur, consolatio autem rei amissa, & non aucta, erat præstanda.* Quid Pusiones delicatulos fecit immortales? digito indicat S. Joannes in Apocalypsi cap. 14. *Hi sunt, qui cum mulieribus non sunt coinguinati, Virgines enim sunt.* Immortalitas Virginitatis est aureola.

CONCEPTUS VI.

Prohibuit DEUS Levitici cap. 21. *Ad omnem mortuum non ingredieris omnino.* Moyses egrediens ex Ægypto in terram promissionis, ossa Joseph secum exportavit: *Tulit ossa Joseph secum.* Exodi cap. 13. *Quæstio oritur, an Moyses Legem Dei non fuerit transgressus? ad omnem mortuum non ingredieris omnino,* cum demortui ossa Joseph ante numerosum exercitum deportari instituerit? S. Isidorus Pelusiota respondet, Moysen minimè Legem Dei violasse, licet mortui ossa Joseph in publico statuerit, & deportari fecerit; causalem addit citatus Isidorus: Lib. 4. ep. 157. scribens: *Eum, qui Castitatem coluit, pro mortuo non haberi.* Convenienter dicitis Divi Apostoli ad Galatas 6. *Qui seminat in spiritu, de spiritu & metet vitam æternam.*

M 2

CON-

CONCEPTUS VII.

De Elia Propheta sacer textus habet: Tulit eum Dominus; curru igneo raptus ad Paradisum, lege lib. 4. Regum cap. 2. ubi tot mille sæcula vivit incorruptus: causalem diuturnæ vitæ dicit S. Ambrosius: *Virginitatem semper coluit.* Unde de Virginitate perorat citatus Pater: *Quid est Castitas Virginalis? nisi expers contagionis integritas.* Lib. 2. de Virginitate Perclarè Sanctus Basilius lib. de vera Virginitate: *Magnum quiddam, & præclarum Virginitas est, que, ut totum simul explicem, hominem incorruptibili Deo simillimum facit: hæc autem profectò non à corporibus ad animas manat: sed cum incorporalis anima propria, & præcipua sit, ejus pretiosissima integritate corpora quoque incorrupta servantur.* Testimonium fert Gerundæ corpus S. Narcissi jam ultra 13. sæcula incorruptum, Corpus Sancti Aldegaris jam ab annis quingentis; Francisci Seraphici Assisi tot pariter sæculis illibatum corpus: Corpus B. Catharinæ Bononiensis jam tribus sæculis incorruptum residens, cui capilli & unguis fectiles succrescunt: ut in Petra Sancta refertur.

Epilogus.

Hortor ergo cum S. Paulo 1. ad Timoth. c. 2. *Vitam agamus in omni Pietate & Castitate, hoc enim bonum est, & acceptum coram Salvatore nostro DEO, qui omnes homines vult salvos fieri, & ad agnitionem veritatis venire.*



IN